

Zeitschrift: Nebelspalter : das Humor- und Satire-Magazin
Band: 80 (1954)
Heft: 25

Artikel: Dr Schützekönig
Autor: [s.n.]
DOI: <https://doi.org/10.5169/seals-493541>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Dr Schützekönig

Jä, me glaubts chumm, was s Schießen imene Dörfli usse für e Bedütig cha ha. Wenn do amme dr Schützekönig usgschtoche wird – potz – das isch müi Seel fascht wien e Presidäntewahl...

s Olgeli, im Fridensrichter z Nienefindige si Tochter, isch so um die Driißgen umme gschprunge – höggschti Zitt für under d Huube. Friili, amene Schatz häts em nit gfeelt; es isch scho lang mit em Ludikarli us dr undere Metzg gweiblet. Gwüs ke schlächti Partii, dä Karli. Aber weiß dr Deuhängger, dr Fridensrichter het eifach no nüt vom Hüürote welle wüsse.

Do ei Tag, s isch grad vor em große Schießet im Dorf gsi, het s Olgeli widremole bim Vatter uf d Schtuude gchlopf: Äs und dr Karli welle jetz vora mache, an dr Pfingschte Verlobig und denn öbben im Schpötlig hüürote.

Jetzt aber isch dr Vatter gschtige. Es het öbben eso tönt: «Was, dä Höselei traut no ans Hüürote z dängge? Eine wo bim Obligatorische nit emol use chunnt, wo nit emol die paar luusige Pünggtli schieße cha. Nei, eso ein wird nit mi Schwiigersuun! Dängg emol, grad

jetz uf e Schießet hi, woni Ehrepräsident bi, wien ich mi do müeßt blamiere!»

Aber jetz het au s Olgeli afo wüeschetue, s het ghüült wien e Schloßhund und het gseit, es gieng ins Wasser, wenns si Karli nit übercheem.

Uf das abe het dr Vatter doch wider e chly Öl müessen uf d Wälle schütte. Er het gseit, wenn dr Ludikarli am Schießet nummen e chli nen aschtändig Resultat tüeg schieße, no chönn me jo wider reden über d Sach...

Am andre Tag isch s Olgeli, wo dr Vatter nienen umme Wäg gsi isch, zum alte Hammerschmiid übre go si Leid chlage. Dä Hammerschmiid isch nämmlig trotz sine Sächzge, won er uf em Buggel het, all no dr bescht Schütz im Dorf; er schießt mit sim Schtutzer wie ke Zweite.

Jo, jetz het euse Schmiid eso richtig Beduures gha mit em Fridensrichter-Meitli. Er well luege, was me do chönn mache. Er well emmel mit em Karli reden und iim non e paar Vörteli biibringe, as emmel s Schieße dasmol e chli besser gieng. Aber ei Bedingig het er gmacht, dä Dunnerwätter: Wenns denn zum Klappe cheem, so heig er e Schmützli vom Olgeli zguet. Item, s Olgeli het no so gärn iigwilliget...

Am Sunntig druf isch dä Schießet do gsi. Ei Schpannig im Schützezüügli. Dr Ludikarli und dr Hammerschmiid si

näbenenanander glägen und hei zu gliicher Zitt gschosse. Und wie? Dr Karli sosalala. Aber dr Schmiid het dr Schport ghaue, potz, si die Schüss alli im Schwarze gsässe. Durane hets gheiße, dr Hammerschmiid putzi das Joor wider. Aber zmol gits en Ufregig: Uf em Schmid sinere Schiibe hei si gwungge – – – e Nuller. Dr Schütz het zerscht e chli verwunderet to, zmol aber gits am Schtand näbezue e Lärme, wie wenn weiß ich was los wer. Uf em Karli sinere Schiibe hei si ne Hunderter zeigt, e prächtigi Musche. Unglaublich, aber s schlägts ke Geiß ewägg.

Dä Hunderter het im Karli nit nummen e Hunderternötli itreit, nei, dä het em grad no zum Schützekönig ghulfe. Mit eim Punggt het er dr Schmiid gschlage...


Jetzt isch dr Fridensrichter lücht umme zbringe gsi. Er het dirägg e Grattel gha uf e Ludikarli. No sällen Obe het er im Olgeli und im Karli si Zueschtimmig gee. Und no sällen Obe het dr Schmiid si Loon yzoge – grad zwei Schmützli het er vom Olgeli übercho.

Aber s groß Gheimnis het numme das Chleeblatt gwüßt: s Olgeli, si Karli und dr Hammerschmiid. Weles Gheimnis? Dä Hunderter wer eigetlich im Schmiid sin gsi, er het en drum in die lätzi Schiibe pfäfferet. Und het drfür e Nuller uf si eigeni Chappe gno, dä guet Kärl. KL

Höchste Leistung trotz niedrigem Preis.

Wie sehr rationelle Serienfabrikation den Preis zu senken vermag, ist heute allgemein bekannt. Unser auf modernste Arbeitsmethoden eingerichteter Betrieb erlaubt die Herstellung eines Qualitäts-Produktes bei geringsten Unkosten. Darin liegt der Schlüssel der bekannten SIBIR-Qualität trotz bescheidenem Preis.

**Verlangen Sie deshalb einen
Original-SIBIR.**



**Kühlschrank für
jedermann
Fr. 295.-**

SIBIR

